

Fau pâ abojâ di zoeunó

Oun dejei d'abetóda, ke faillei jiami bailleu ona jifla a oun zoènèt, po chin ke porei próo no la rindre .

Ire dou tin ke le grau Mêrâ ire le mètre dè la cómona. Ire oun bon maton, mé lanmâye bien inmêrdâ lo moundó. Ona né, iè partei deperlui i matte in y ma'in dedin. Aroâ in in Artsenó, i'a iou ke le granze dou Tognin dè la Chiba ire ouêcha. I'è th'intrâ. Chou la tâbla dè la tsambra, lei aei oun barlótson plin dè bonna cran'ma tsaplâye dè pan blan. Ché l'an, ire jióstamin le maton ke cajenâye, ire inco oun zoènèt, poève aei ona künzein'na d'an, adon kè l'âtre ire ou bon dè l'âjió.

Sti maton, ché zo, ire j'ou fóura è lè meijon, è le mâre, po li fére pleijic, li aei bailla oun pan blan d'oun batse. In ché tin, ire oun biõ cadau.

Sti, to countin, ch'ire proumetou dè fére davoueu bónne rebóte. I'a tsaplâ ché né la meitchia dou pan blan, è l'âtra la catchieite por oun âtre cau.

Ora bon, sti Mêrâ in vèyin sti barlèt, chin fére dè coumplemin (i'è pâ ke i'óche jóu fan) prin sti barlèt è lo vouide dèan lè joueu dè l'âtre.

Bïn chioú sti pauró maton i'a pâ oujâ li deure oun mo è chin i'è pachâ dinche.

Oun par d'an apré, oun zo i'an poublia lè tra'au dou mólin dè la Tsonmètta. stóó dau lei iran. Chin, adon le maton dou Zognè ire enou oun grau lóron è ire ou bon dé l'âjió. L'âtre per countro i'aei brâmin bailla bâ. Le tra'au ché chon bien pachâ tan kè hlo dèlotâ. Chin, triyêvoun foura dè grauche pire lo lon dè Bórne, aou la palantse dou fê. To per oun cau, kan i'a troâ chin amódó, le maton dou Zognè, fé lo noun dè dèhapâ aou la palantse è trabetse fran in pè l'âtre è lo fo rion in Bórne. Bïn chioú adon, tui hlóó k'iran lé, tui dè li deure – « kinta mostra béthe . ! » Mé le Mêrâ chórte di Bórne, è lóó dic :- « Na nâ, tsincagneu lo pâ, i'a pâ fé èsprè ! »

Ché né kan i'an jóu fornei lo tra'au, le Mêrâ iè th'enoú countre sti maton è li dic :-« T'ou-thó pachâ bâ ou sely aou mè ané ? – bo sto ou ! »

Ora bon, kan ch'on jóu amoun a Mache, ch'on jóu bâ ou sely. Kan ch'on jóu dedin, le Mêrâ i'a fèrmâ la porta apré lóóc. Adon le zoeunó, i'a mojâ intre luic – « O ! che m'atake, chari próo mè dèfindre ! » I'a pâ jóu bèjoin dè chin, fran adon le Mêrâ li dic :- « Chi po pórke to m'a betchia in Borne, è t'in vouei pâ. Ora té, prin chin ke tó ou ! E rèvinze-tè dè la barlotsonâ dè cran'ma. » In mémo tin, li mè dèan luic, bótóille dè vïn, pan fromâzó bouro, milye.

Ché né, i'an fé rebota tota la né insimbló è ch'on jóu lè mèillóó j'amic. Le Mêrâ i'a choupoú chin prindre.